

signor soldan si lamentava di la venuta di 3 galie solle, oltra el consueto di 5 et 6 soleva andar; et che non era stà fato facende, come erano soliti venifiani; et *etiam* el pocho far de merchadantia de' bazarioti, de li quali l'era stà per li suo' ministri informato esserne sopra le galie ducati 40 milia. La qual cossa era falsa, perchè mercadanti et bazarioti de quelle, sapendo le galie non poter cargar da poi muda, haveano fato le sue investide, et erano rimasti senza danari; niente di meno la intention dil soldan era far questa demonstratione, a zio che, se l'ne era summa alcuna de danari su le galie, quella *statim* li fosse mandata im parte del pagamento del ditto suo piper, dato a la nation per forza, *ut supra*, perchè pocho inanzi, zoè quando detè da poi muda le sporte 250 piper, rechiedendo ducati 20 milia in contadi a bon conto, et loro, non li havendo fato ogni posibel experientia, con interessi ebene difficoltà trovar solamente ducati 6000, et quelli mandarli, cussi cerchava con tal comandamento far paura a' nostri, a zio li mandasse qualche altra summa de contadi, ma quei non li havendo conzo mastelada, zercha a tal carbuio, con i suo' ministri, si che questo tal comandamento non have executione.

A presso, essendo esso signor soldan disposto voler da essi merchadanti nostri danari, contra ogni possibilità de la natione, mandò uno nuovo comandamento in Alexandria, zercha do mexi da poi spirata la muda, *maxime* quando credevano esser licentiatu de porto, per el qual comandamento, essendo astreti el consolo nostro, et merchadanti, o vero tuor per zercha ducati 30 milia de altre specie, zenzeri beledi, chanele et verzi, pur restate nel Dechieri, et darli i danari in istante, et oltra quelli darli altri ducati 30 milia a conto del piper dito, o vero non el fazando, fuseno astreti el consolo et merchadanti montar al Cajero. De che, fata ogni resistentia et experientia de fuzir l'una et l'altra difficoltà, li fu necessario, non havendo modo trovar ditti danari, andar al Cajero a la presentia del signor soldan, el qual se li feze venir davanti, et feceli gran rebufo et terror, dicendo che i erano venuti a desfar el suo paexe, che dove veniva 6 et 8 galie, al presente i venivano con 3 povere galie, et non desordenase i viazi, et veniseno con galie riche, come faceano in altri tempi, o vero *de presenti* i pagaseno tuto el piper, che era sporte 460, in tanti contadi, a raxon de ducati 192 la sporta, che, oltra i ducati 6000 dati per parte per avanti, veniva a montar in resto 84 milia, et quelli *statim* i trovaseno o con interesse o *quomodocumque*, et feceli meter in cadene con manaze

grandissime; sì che i poveri consolo et mercadanti, non posando aver fato alcuna defesa, nè justificato le cosse sue, temendo le manaze et furor de ditto soldan, che non voleva aldir defesa alcuna, promesseno per carta dar ditti ducati 84 milia in mancho de uno miexe, et qui se aforzono, per via de ogni gravissima usura et interesse, trovar ditti danari, ma non poteno passar la summa di ducati 20 milia tolti a usura, con danno di ducati 4000, in termene di mexi 6.

In questo *interim* el signor soldan mandò comandamento in Alexandria, che l' fusse aperte le camere di mercadanti ad una ad una, *similiter* i schrigni, casse et caselete, et notado l'aver de quelle, et poi bolado di suo bola, et *similiter* questo istesso sopra le galie, alegando nel suo comandamento far questo, per esser stà informato in terra et in galia 88 la nation haver danari, et non li voler sborsar im pagamento del suo piper; de che in terra et galia per nostri fu lassato senza resistentia a li sui comessi aprir, notar et bolar, *ut supra*, ben che la fosse cossa injustissima et mai più non fata, *tamen* li fu lassato veder el tutto, a zio el trazesse de opinion, la nation havesse danari, non li havendo.

*Præterea*, vedendo el capetanio nostro la longa dimora im porto, di 4 mesi da poi spirata la muda, et sollicitando di haver licentia da l'armirajo di partirse, fu necessario a l'armirajo scriver al soldan quello el comandava zercha a tal licentia, perchè ad alcuni segni che fazeva el capetanio, in aversi tirado al Farion, far speso gindar, et star in brula, el giudicava, che facilmente el se potria partir, *etiam* senza licentia, perchè el signor soldan volesse comandarli *quid faciendum*. El signor soldan li rescrisse, che se l' si dubitava de questo, el dovesse mandar a dimandar le velle et timoni de le galie al capetanio, el quale non le dando in terra, esso signor, con quel del castello, dovesse bombardar le galie et mandarle a fondi. De che el signor de Alexandria, hauto tal comandamento, vene, con tuti i suo' mamaluchi, et altra gran comitiva, con bandiere quare, al Assarion, et li, afermato et drezato le bombarde a la volta de le galie, et trato uno colpo di bombarda, qual andò per prova de le galie per far terror, mandò subito el suo armirajo, et altri sui oficiali, a domandar al capetanio le velle et timoni de tute le galie; et quelle havendo recusà volerlo far, li comandò che là, dove el steva in bocha de porto a presso el Farion, *saltim* el dovesse tirarsse più dentro. El capetanio nostro, che era informato alquanto del suo mal voler, temendo el pericolo, recusò *etiam* levarse dal loco dove l'era, excusandose esser li più sicuro de mar